



Իրավունքների Պաշտպանություն
Առանց Սահմանների ՀԿ



NATIONAL
ENDOWMENT
FOR
DEMOCRACY

SUPPORTING FREEDOM AROUND THE WORLD

**ԳԼԽԱՎՈՐ ԴԱՏԱԽԱՋՈՒԹՅԱՆ ԱՊՕՐԻՆԻ ԾԱԳՈՒՄ
ՈՒՆԵՑՈՂ ԳՈՒՅՔԻ ԲՈՆԱԳԱՆՁՄԱՆ ԳՈՐԾԵՐՈՎ
ՎԱՐՉՈՒԹՅԱՆ ՊԵՏԻ ԵՒ ՎԱՐՉՈՒԹՅԱՆ ՊԵՏԻ
ՏԵՂԱԿԱԼԻ ԹԵԿՆԱԾՈՒՆԵՐԻ ԸՆՏՐՈՒԹՅԱՆ ԲԱՑ
ՄՐՑՈՒՅԹԻ ԴԻՏԱՐԿՄԱՆ ԱՐԴՅՈՒՆՔՆԵՐԻ
ՎԵՐԱԲԵՐՅԱԼ**

ԶԵԿՈՒՅՑ

2025

Սույն զեկույցը պատրաստվել է «Իրավունքների պաշտպանություն առանց սահմանների» հասարակական կազմակերպության կողմից իրականացվող «Դատական ավելի մեծ բարեփոխումների խթանում» ծրագրի շրջանակներում: Ծրագիրն իրականացվել է ԱՄՆ Ժողովրդավարության ազգային հիմնադրամի (NED) ֆինանսավորմամբ:

Զեկույցում տեղ գտած տեսակետները և վերլուծությունները արտահայտում են հեղինակի կարծիքը և կարող են չհամընկնել Ժողովրդավարության զարգացման հիմնադրամի տեսակետների և դիրքորոշումների հետ:

Մրցույթը դիտարկել և սույն զեկույցը պատրաստել է Դիանա Հարությունյանը:

Գլխավոր դատախազության ապօրինի ծագում ունեցող գույքի բռնագանձման գործերով վարչության պետի և վարչության պետի տեղակալի թեկնածուների ընտրության բաց մրցույթի դիտարկման արդյունքների վերաբերյալ

Զեկույց

2025 թվականի մայիսի 14-ին տեղի է ունեցել ՀՀ Գլխավոր դատախազության ապօրինի ծագում ունեցող գույքի բռնագանձման գործերով վարչության պետի և վարչության պետի տեղակալի թեկնածուների ընտրության բաց մրցույթը¹:

Գլխավոր դատախազին առընթեր որակավորման հանձնաժողովի կազմը

ՀՀ գլխավոր դատախազության որակավորման հանձնաժողովը ապօրինի ծագում ունեցող գույքի բռնագանձմանն ուղղված գործառույթներ իրականացնող դատախազների թեկնածությունների ցուցակի համալրման նպատակով անցկացվող բաց մրցույթի դեպքում կազմված է 11 անդամից:² Որակավորման հանձնաժողովի կազմի մեջ են մտնում ՀՀ գլխավոր դատախազի կողմից նշանակվող գլխավոր դատախազի մեկ տեղակալ, չորս դատախազ և չորս իրավաբան-գիտնական, իսկ ապօրինի ծագում ունեցող գույքի բռնագանձմանն ուղղված գործառույթներ իրականացնող դատախազների թեկնածությունների ցուցակի համալրման նպատակով անցկացվող բաց մրցույթի դեպքում՝ նաև երկու փորձագետ, որոնց նշանակում է գլխավոր դատախազը: Փորձագետները պետք է ունենան ապօրինի ակտիվների վերադարձի ոլորտում գիտական կամ պրակտիկ աշխատանքի կամ կոռուպցիոն հանցագործությունների քննության առնվազն երեք տարվա փորձառություն:³ Որակավորման հանձնաժողովը ղեկավարում է գլխավոր դատախազի տեղակալը: Հանձնաժողովի նիստն իրավագոր է, եթե նիստին ներկա է Հանձնաժողովի առնվազն 8 անդամ:

Դիտարկված մրցույթին հանձնաժողովի 11 անդամից ներկա են եղել առաջին թեկնածուի հարցազրույցին 8, իսկ երկրորդ թեկնածուի հարցազրույցի ընթացքում՝ 9-ը անդամ, մասնավորապես՝ Որակավորման հանձնաժողովի նախագահ Արամ Արամյանը, անդամներ՝ Արմեն Փանոսյանը, Տաթևիկ Խաչատրյանը, Կարեն Հարությունյանը, Վարազդատ Սուքիասյանը, Տաթևիկ Սարուխանյանը, Տաթևիկ

¹ Տե՛ս մրցույթի վերաբերյալ հայտարարությունը
<https://www.prosecutor.am/annoucement/3154>

² Տե՛ս «Դատախազության մասին» ՀՀ օրենք, հոդված 23

³ Տե՛ս որակավորման հանձնաժողովի կազմը
<https://www.prosecutor.am/page/59>

Պետրոսյանը և Գնել Մուլնեցյանը, իսկ երկրորդ թեկնածուի հարցազրույցին մասնակցել է նաև խորհրդի անդամ Արտակ Հարությունյանը:

Մրցույթին դիմած թեկնածուները

ՀՀ Գլխավոր դատախազության ապօրինի ծագում ունեցող գույքի բռնագանձման գործերով վարչության պետի և վարչության պետի տեղակալի մրցույթին մասնակցել են երկու թեկնածուներ՝

1. Կորյուն Մերոբյանը, ով դիմելու պահին զբաղեցրել է Գլխավոր դատախազության հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության պետի տեղակալի պաշտոնը՝ կատարելով պետի պաշտոնակատարի պարտականությունները,
2. Հոփսիմե Ասատրյանը, ով դիմելու պահին զբաղեցրել է Գլխավոր դատախազության իրավաբանական վարչության բաժնի պետի պաշտոնը:

Հարկ է նշել, որ Որակավորման հանձնաժողովի կողմից մրցույթի ընթացքում չի հստակեցվել, թե թեկնածուներից յուրաքանչյուրը որ պաշտոնի համար էին առաջադրվել:

Հաշվի առնելով տեղեկատվության բացակայությունը՝ Կազմակերպությունը հարցմամբ դիմել է ՀՀ գլխավոր դատախազություն՝ ստանալու պաշտոնական պարզաբանում: Ի պատասխան հարցմանը՝ ՀՀ գլխավոր դատախազության ապօրինի ծագում ունեցող գույքի բռնագանձման գործերով վարչության պետի և նույն վարչության պետի տեղակալի թեկնածությունների ցուցակը համալրելու համար հայտարարված բաց մրցույթին դիմել են երկու թեկնածու և դրական եզրակացություն ստանալու արդյունքում ՀՀ գլխավոր դատախազի հրամանով ընդգրկվել են ապօրինի ծագում ունեցող գույքի բռնագանձման ուղղված գործառույթներ իրականացնող ստորաբաժանման դատախազների թեկնածությունների ցուցակում:⁴

Այսինքն, հայտարարությունը տարանջատված չի եղել ըստ հաստիքների, ինչի արդյունքում առկա է ողջամիտ ենթադրություն, որ հայտերում չեն առանձնացվել, թե որ պաշտոնին է հավակնում թեկնածուն:

Մրցույթի ընթացքը

Դիտարկված մրցույթը անց է կացվել բաց մրցույթի կարգով, որի շրջանակներում ի թիվս օրենքով սահմանված փաստաթղթերի՝ հայտատուն

⁴ Գրության պատասխան թիվ 03/064/13397-25

ներկայացնում է նաև «Կոռուպցիայի կանխարգելման հանձնաժողովի մասին» ՀՀ օրենքով նախատեսված բարեվարքության վերաբերյալ լրացված հարցաթերթիկ: Հանձնաժողովի անդամները հաշվի են առնում նաև հայտատուի վերաբերյալ Կոռուպցիայի կանխարգելման հանձնաժողովի տրամադրած բարեվարքության վերաբերյալ խորհրդատվական եզրակացությունը:

Մրցույթի շրջանակներում թեկնածուի հետ անցկացվող հարցազրույցի միջոցով որակավորման հանձնաժողովը ստուգում է հայտատուի մասնագիտական պատրաստվածությունը, գործնական հմտությունների, իր կարգավիճակին վերաբերող հիմնարար իրավական ակտերի պահանջներին տեղեկացվածությունը, նրա անձնական որակները և արժանիքները (ինքնատիրապետում, վարվեցողություն, ունկնդրելու կարողություն, հաղորդակցման հմտություններ, վերլուծական կարողություններ և այլն) հատկանիշները, որը կատարվում է այդ նպատակով կազմված հարցաշարի հիման վրա տրված հարցերի միջոցով:⁵

Այսպես, դիտարկված մրցույթի ընթացքում հաջորդաբար ներս են հրավիրվել թեկնածուները:

Հարցազրույցների սկզբում ուսումնասիրվել են թեկնածուների փաստաթղթերը և մասնագիտական փորձառությունը:

Առաջին թեկնածուն մրցույթին դիմելու պահին զբաղեցրել է Գլխավոր դատախազության՝ Հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության պետի տեղակալի պաշտոնը՝ կատարելով պետի պաշտոնակատարի պարտականությունները:

Հարցազրույցի ընթացքում բարձրացվել են հարցեր, որոնք առնչվել են թեկնածուի՝ քրեական մասնագիտացումից քաղաքացիական մասնագիտացման բաժին տեղափոխվելու պատճառներին, ինչպես նաև հմտություններին՝ աշխատանքային գործընթացի կազմակերպման տեսանկյունից: Մասնավորապես, թե ի՞նչ ռազմավարություն ունի թեկնածուն աշխատանքի կազմակերպման ոլորտում, արդյո՞ք նա ունեցել է աշխատանքային փորձ բաց աղբյուրների հետ աշխատելիս, և ինչպիսի՞ գործիքակազմ է կիրառում այդ ուղղությամբ: Թեկնածուն նշել է, որ միջազգային գործընկերների հետ ինտեսիվ աշխատանք է տարվում, բացի այդ թեկնածուն, արձագանքելով բարձրացված հարցերին, ներկայացրել է կոնկրետ օրինակներ իր վարույթում քննված քրեական գործերից: Ինչ վերաբերում է բաց

⁵ Տե՛ս <https://www.prosecutor.am/page/14>

աղբյուրներին՝ թեկնածուն նշել է, որ հիմնականում տեղեկատվությունը փնտրում է «Google» տեղեկատվական հարթակի միջոցով:

Երկրորդ թեկնածուն մրցույթին դիմելու պահին զբաղեցրել է դատախազության իրավաբանական վարչության բաժնի պետի պաշտոնը: Հարցազրույցի ընթացքում հնչել են հարցեր, որոնք վերաբերում էին թեկնածուի՝ ապօրինի ծագում ունեցող գույքի բռնագանձման վարչություն տեղափոխվելու շարժառիթին, քանի որ այն ավելի ռիսկային է՝ ըստ հանձնաժողովի անդամի: Թեկնածուն նշել է, որ ապօրինի ծագում ունեցող գույքի բռնագանձման վարչության գործունեությունը հիմնականում քաղաքացիական իրավունքի ոլորտում է, ինչը, ըստ նրա, լավ հնարավորություն է խորացնելու և զարգացնելու իր գիտելիքներն քաղաքացիական ու վարչական իրավունքի ուղղություններով: Բացի այդ, թեկնածուի դիտարկմամբ՝ տվյալ ոլորտում իրականացվող աշխատանքը առավել բազմաբնույթ և բազմազան է:

Հարցին, թե վարչությանը ի՞նչ բաղադրիչներ են պակասում և ի՞նչ փոփոխություններ կցանկանար ներդնել վարչությունում, թեկնածուն պատասխանել է, որ առաջնային է համարում միասնական մոտեցման կիրառումը, մասնագիտական կարծիքների ակտիվ քննարկումն ու դրանց արդյունքում ընդհանուր դիրքորոշման ձևավորումը: Միննույն ժամանակ, թեկնածուն նշել է, որ քանի դեռ անմիջականորեն ներգրավված չէ վարչության աշխատանքներում, չի կարող հստակ պատասխանել հարցին:

Միջազգային իրավական համագործակցության ոլորտում ունեցած փորձի վերաբերյալ հարցին ի պատասխան՝ թեկնածուն նշել է, որ ուղղակի փորձառությունը այս ոլորտում մեծ չէ, սակայն իր աշխատանքային գործունեության ընթացքում մասնակցել է սեմինարների, մասնավորապես Բունդեսթագում ստացած կրթաթոշակի շրջանակներում ձեռք է բերել փորձ միջազգային գործընկերների հետ: Ըստ նրա՝ նման փորձը նպաստել է միջազգային լավագույն պրակտիկայի ճանաչմանը, ինչը կարևոր է արդյունավետ լուծումների կիրառման համար:

Հարցազրույցների հաջորդ հատվածում անդրադարձ է կատարվել թեկնածուների բարեվարքությանը, ինչպես նաև վարքագծի կանոններին, ղեկավարման ու կառավարչական հմտություններին՝ հաշվի առնելով ինչպես Կոռուպցիայի կանխարգելման հանձնաժողովի եզրակացությունները, այնպես էլ հրապարակային այլ տեղեկությունները թեկնածուների վերաբերյալ:

Առաջին թեկնածուի վերաբերյալ հրապարակվել է ԿԿՀ դրական եզրակացության եզրափակիչ մասը: Միաժամանակ, արձանագրվել են թեկնածուի բանկային մնացորդների հետ կապված տեխնիկական խնդիրներ: Ինչպես նաև

թեկնածուն ստացել է բնակարանի ձեռքբերման նպատակով վարկ, սակայն տվյալը չի արտացոլվել հայտի փոխառությունների բաժնում: Թեկնածուն բացատրել է, որ տվյալը փոխառությունների բաժնում չի լրացվել՝ պայմանավորված անհրաժեշտության վերաբերյալ իրազեկման բացակայությամբ:

Բացի այդ, հարց է հնչել այն մասին, թե արդյո՞ք թեկնածուի մերձավոր ազգականները զբաղեցնում են պաշտոններ իրավապահ մարմիններում, որին ի պատասխան վերջինս հայտնել է, որ այդպիսի հանգամանքներ չկան:

Երկրորդ թեկնածուի վերաբերյալ հրապարակվել է ԿԿՀ դրական եզրակացության եզրափակիչ մասը: Միաժամանակ նշվել է, որ Կենտրոնական բանկից սահմանված ժամկետում չեն ստացվել բանկային գաղտնիքի մասին տեղեկատվություն և ուսումնասիրությունը կատարվել է առանց բանկային գաղտնիքի վերաբերյալ ուսումնասիրության:

Թեկնածուի կողմից ներկայացված բարեվարքության հարցաթերթիկում բացակայել են տվյալներ փաստացի տիրապետման իրավունքի հիմքով օգտագործվող անշարժ գույքի վերաբերյալ: Թեկնածուն պարզաբանել է, որ տվյալ բնակարանը իրեն չի պատկանում, և հիմք համարելով սեփականության բացակայությունը՝ այն նշել է բացառապես որպես իր բնակության հասցե:

Բացի վերոգրյալից, արձանագրվել են որոշ անհամապատասխանություններ նաև թեկնածուի ներկայացրած աշխատավարձի վերաբերյալ տվյալներում: Մասնավորապես՝ հայտում նշված աշխատավարձի չափի և փաստացի տվյալների միջև եղել են տարբերություններ: Թեկնածուն նշել է, որ այն հանդիսացել է բացթողման հետևանք: Թեկնածուն պարզաբանել է, որ այդ ընթացքում փոխվել է վերջինիս զբաղեցրած պաշտոնը և լրացվել է այդ պահի դրությամբ ստացված եկամուտը:

Հարցազրույցների վերջին հատվածում թեկնածուներին տրվել են 6 մասնագիտական բնույթի հարցեր:

Համաձայն «Ապօրինի ծագում ունեցող գույքի բռնագանձման մասին» օրենքով սահմանված գործառույթներ իրականացնող դատախազների և այդ ոլորտը համակարգող ՀՀ գլխավոր դատախազի տեղակալի թեկնածությունների ցուցակների համալրման նպատակով անցկացվող բաց մրցույթների կազմակերպման ընդհանուր դրույթների 30-րդ և 31-րդ կետերի՝ հարցազրույցի ընթացքում Հանձնաժողովի յուրաքանչյուր անդամ թեկնածուին կարող է տալ առավելագույնը երկու հարց, սակայն ընդհանուր հարցերի քանակը պետք է լինի առնվազն վեցը, իսկ հարցերից

առնվազն երկուսը պետք է վերաբերեն «Ապօրինի ծագում ունեցող գույքի բռնագանձման մասին» օրենքով նախատեսված կարգավորումներին:

Հարցերը տրվել են «Ապօրինի ծագում ունեցող գույքի բռնագանձման մասին» օրենքով նախատեսված գործառույթներ իրականացնող դատախազների թեկնածությունների ցուցակի համալրման նպատակով անցկացվող մրցույթի հարցաշարից:⁶

Առաջին թեկնածուին ուղղված հարցերը վերաբերել են հետևյալին. մասնավորապես՝

- Կաշառք ստանալու և կաշառք տալու քրեաիրավական բնութագրերը, որի վերաբերյալ թեկնածուի պատասխանը գնահատվել է ճիշտ,
- Ապօրինի ծագում ունեցող գույքի բռնագանձման հայց հարուցելու նպատակով ուսումնասիրություն սկսելը և դրա հիմքերը/ՄԴ որոշման համատեքստում, որի վերաբերյալ թեկնածուի պատասխանը գնահատվել է ճիշտ,
- Պաշտոնատար անձի կողմից ձեռնարկատիրական գործունեությանն ապօրինի մասնակցելու քրեաիրավական բնութագիրը, որի վերաբերյալ թեկնածուի պատասխանը գնահատվել է ճիշտ,
- Հաշտության համաձայնությունը քաղաքացիական դատավարությունում, որի վերաբերյալ պատասխանը գնահատվել է ճիշտ,
- «Ապօրինի ծագում ունեցող գույքի բռնագանձման մասին» օրենքում օգտագործվող հիմնական հասկացությունները, որի վերաբերյալ թեկնածուի պատասխանը գնահատվել է մասնակի սխալ,
- Գույքի նկատմամբ հայցի նախնական ապահովման միջոցների կիրառումը և ապացույցների ապահովումը, որի վերաբերյալ թեկնածուի պատասխանը գնահատվել է մասնակի սխալ:

Երկրորդ թեկնածուին ուղղված հարցերը վերաբերել են հետևյալին. մասնավորապես՝

- Ապացուցման բեռը քաղաքացիական դատավարությունում, որի վերաբերյալ թեկնածուի պատասխանը գնահատվել է մասնակի սխալ,
- Ապօրինի ծագում ունեցող գույքի բռնագանձման հայց հարուցելու նպատակով ուսումնասիրություն սկսելը և դրա հիմքերը, որի վերաբերյալ թեկնածուի պատասխանը գնահատվել է ճիշտ,

⁶ Տե՛ս <https://www.prosecutor.am/page/14>

- Ապօրինի ծագում ունեցող գույքի բռնագանձման վարույթի շրջանակներում ապացուցման առանձնահատկությունները, որի վերաբերյալ թեկնածուի պատասխանը գնահատվել է մասնակի սխալ,
- Հայցային վաղեմություն, որի վերաբերյալ թեկնածուի պատասխանը գնահատվել է ճիշտ,
- Ապացույցների վերաբերելիությունը և թույլատրելիությունը քաղաքացիական դատավարությունում, որի վերաբերյալ թեկնածուի պատասխանը գնահատվել է ճիշտ,
- Ապօրինի ծագում ունեցող գույքի բռնագանձման վարույթի ավարտումը հաշտության համաձայնությամբ, հաշտության համաձայնության պայմանների խախտմամբ պետությանը պատճառված վնասը և դրա հատուցումը, որի վերաբերյալ թեկնածուի պատասխանը գնահատվել է մասնակի սխալ:

Քվեարկություն և արդյունքների ամփոփում

Հանձնաժողովը տվյալ օրվա բոլոր թեկնածուների հետ հարցազրույց անցկացնելուց հետո քննարկում է յուրաքանչյուր թեկնածուի վերաբերյալ եզրակացություն տալու հարցը, որի ժամանակ Հանձնաժողովի անդամները կարող են արտահայտել իրենց կարծիքը: Քննարկումն իրականացվում է դոնփակ և չի ձայնագրվում: Տվյալ օրվա մրցույթին մասնակցող բոլոր թեկնածուների վերաբերյալ քվեարկություն կազմակերպելուց հետո այդ օրվա թեկնածուները հրավիրվում են հարցազրույցի անցկացման սենյակ, որտեղ Հանձնաժողովի նախագահը բարձրաձայն ընթերցում է այդ օրվա բոլոր եզրակացությունները, այն է՝ հայտարարում է մասնակցի ազգանունը, անունը, հայրանունը՝ նշելով եզրակացության դրական կամ բացասական լինելը:⁷

Դիտարկված մրցույթի ընթացքում Որակավորման հանձնաժողովը յուրաքանչյուր թեկնածուին լսելուց հետո կազմակերպել է քվեարկություն, որից հետո հրապարակել է եզրակացության արդյունքները:

Ինչպես վերը նշվեց, դիտարկված մրցույթի շրջանակում Որակավորման հանձնաժողովի անդամներից մեկը մասնակցել է միայն երկրորդ թեկնածուի հարցազրույցին և, հետևաբար, քվեարկությանը:

⁷ Տե՛ս «Ապօրինի ծագում ունեցող գույքի բռնագանձման մասին» օրենքով նախատեսված գործառնություններ իրականացնող դատախազների և ապօրինի ծագում ունեցող գույքի բռնագանձմանն ուղղված գործառնությունների ոլորտը համակարգող՝ ՀՀ գլխավոր դատախազի տեղակալի թեկնածությունների ցուցակների համալրման նպատակով անցկացվող բաց մրցույթների կազմակերպման ընդհանուր դրույթների 36-43-րդ կետերը <https://www.prosecutor.am/page/14>

Քննարկումների արդյունքում՝ Որակավորման հանձնաժողովը դրական եզրակացություն է տվել ՀՀ գլխավոր դատախազության ապօրինի ծագում ունեցող գույքի բռնագանձման գործերով վարչության պետի թափուր հաստիքին և վարչության պետի տեղակալի նոր ստեղծված հաստիքին նշանակում կատարելու նպատակով բաց մրցույթի երկու մասնակիցներին, ովքեր ընդգրկվել են ապօրինի ծագում ունեցող գույքի բռնագանձմանն ուղղված գործառույթներ իրականացնող ստորաբաժանման դատախազների թեկնածությունների ցուցակում:

ՀՀ գլխավոր դատախազի համապատասխան հրամաններով Կորյուն Մերոբյանը նշանակվել է Գլխավոր դատախազության ապօրինի ծագում ունեցող գույքի բռնագանձման գործերով վարչության պետի պաշտոնին, իսկ Հռիփսիմե Ասատրյանը նշանակվել է Գլխավոր դատախազության ապօրինի ծագում ունեցող գույքի բռնագանձման գործերով վարչության պետի տեղակալի պաշտոնին⁸:

Ամփոփում

- Ապօրինի ծագում ունեցող գույքի բռնագանձման գործերով վարչության պետի ու պետի տեղակալի թափուր հաստիքների համալրման նպատակով հայտարարվել է մեկ մրցույթ, որին դիմել են երկու թեկնածուներ: Մրցույթի հարցազրույցի շրջանակներում հստակեցված չի եղել, թե թեկնածուների ով կոնկրետ որ պաշտոնի համար է առաջադրվել, ինչը էական հանգամանք է գնահատելու անձի՝ կոնկրետ պաշտոնում նշանակման համար անհրաժեշտ անձնային և մասնագիտական որակները:
- Որակավորման հանձնաժողովի անդամներից մեկը մասնակցել է միայն թեկնածուներից մեկի հարցազրույցին և քվեարկությանը:
- Դիտարկված մրցույթի երկու թեկնածուներն էլ ստացել էին բարեվարքության դրական եզրակացություն Կոռուպցիայի կանխարգելման հանձնաժողովի կողմից:
- Որակավորման հանձնաժողովի կողմից քննարկման առարկա են դարձել Կոռուպցիայի կանխարգելման հանձնաժողովի կողմից բարեվարքության եզրակացություններով բարձրացրած հարցադրումները և մտահոգությունները:
- «Ապօրինի ծագում ունեցող գույքի բռնագանձման մասին» օրենքով նախատեսված գործառույթներ իրականացնող դատախազների թեկնածությունների ցուցակի համալրման նպատակով անցկացվող մրցույթի հարցաշարից հարցերը ընտրվել և հնչեցվել են թեկնածուներին Որակավորման հանձնաժողովի անդամների կողմից:

⁸ <https://www.prosecutor.am/article/4972>

Առաջարկություններ

- Մի քանի հաստիքների համալրման նպատակով կազմակերպված մրցույթի շրջանակներում հստակ սահմանել, թե թեկնածուն որ հաստիքին է առաջադրվել՝ կոնկրետ պաշտոնում նշանակման համար անհրաժեշտ անձնային և մասնագիտական որակների պատշաճ և արդարացի գնահատման ապահովման նպատակով:
- Վերանայել թեկնածուների մասնագիտական կարողությունների ստուգման փուլի ընթացքում հարցերի ընտրության կարգը՝ ներդնելով թեկնածուների կողմից հարցատոմսեր ընտրելու մեխանիզմ: